

Varios Tabloid Mericano cu storianan sensacionalista encunto Natalee

ORANJESTAD (AAN); Manera DIARIO a indica siman pasa caba, cu por lo menos dos revista Mericano tipo "Tabloid Journalism", esta National Enquirer y Globe, ta bin cu algun articulo fuerte riba e asunto di Natalee perdi na Aruba.

Esey ta exactamente loke nan a presenta tambe. E edicionnan cu fecha 4 di Juli di National Enquirer, ta muestra cu nan investigacion a conclui cu Natalee a worde droga, y despues laga atras pa asina e muri.

National Enquirer ademá ta profundiza su mes riba e bida di e sospechoso Joran van der Sloot, indicando riba descubrimientonan cu nan mes a haci, e.o. cu el a pone potret di dje riba un website ta haciendo wegan di sadomasochismo. Tambe a muestra cu Joran ta un persona kende ta usa triki pa logra haya mucha muhernan Mericano y inocente, pa bay cama cune.

E revista a muestra cu un fuente ta revela, cu un combinacion di alcohol y droga por a pone un overdose den Natalee su curpa, y esun cu tabata cune a bay den panico y a dicidi di benta su curpa afo.

E otro revista "Globe", tambe ta enfoca hopi riba e bida "violento" cu Joran tabatin, segun fuentenan a revela den entrevista cu cada periodista a logra na Aruba.

Tin di menciona, cu contrario na canalnan di noticia regular, cu esnan di Tabloid Journalism ta funciona den e forma cu nan ta "paga cash" na fuentenan pa nan duna nan storia.

